



Republika e Kosovës  
Republika Kosova - Republic of Kosovo  
*Qeveria – Vlada – Government*

*Ministria e Arsimit, e Shkencës dhe e Teknologjisë - Ministarstva Obrazovanja Nauke i Tehnologije -  
Ministry of Education Science & Technology*

Kabineti i Ministrit / Kabinet Ministra / Cabinet of the Minister

## **UDHËZIM ADMINISTRATIV LICENCIMI I MËSIMDHËNËSVE**

**NUMËR: 5/2010**  
**DATË: 27. 04. 2010**

Në mbështetje të nenit 93 (4) të Kushtetutës së Republikës së Kosovës, neneve 12.5, 32.1, dhe 32.2 të Ligjit për arsimin fillor dhe të mesëm në Kosovë, si dhe paragrafit 7 të nenit 25 të Rregullores së Punës të Qeverisë së Kosovës nr. 1/2007, Ministria e Arsimit, e Shkencës dhe Teknologjisë nxjerr këtë Udhëzim administrativ:

### **Neni 1 Qëllimi**

**1.** Përmes këtij Udhëzimi administrativ (më tutje në tekst “UA”), Ministria e Arsimit, e Shkencës dhe e Teknologjisë (më tutje në tekst “MASHT”) krijon një sistem koherent të licencimit dhe të avancimit në karrierë të mësimitdhënësve mbi bazën e kualifikimit, përvojës, zhvillimit profesional dhe performancës si dhe krijon strukturën e pagesave përkitazi me këtë sistem.

### **Neni 2 Definicionet**

**1.** “*Personeli jomësimitdhënës*” – janë menaxherët dhe administratorët (drejtorët, zëvendësdrejtorët, individët përgjegjës për ndërrime, sekretarët), dhe bashkëpunëtorët profesional (psikologët, punëtorët social, bibliotekarët).

2. **“Diploma”** – certifikatë apo dëshmi që vërteton diplomimin/kualifikimin nga shkolla normale, shkolla e lartë pedagogjike apo fakulteti përkatës në institucionet e arsimit të lartë në Kosovë, apo edhe institucionet jashtë vendit e që kanë kaluar nëpër procesin e njohjes së diplomave të tyre sipas dispozitave në fuqi në Kosovë.
3. **“Fakultetet arsimore”** – janë fakultete që ofrojnë programe të profilit arsimor ku përfshihet komponenta akademike, pedagogjike/arsimore dhe praktika e mësimdhënies
4. **“Fakultetet joarsimore”** – janë fakultetet që nuk ofrojnë programe të profilit arsimor për përgatitjen e mësimdhënësve (fakultetet teknike, fakulteti i mjekësisë, fakulteti ekonomik etj).
5. **“Licenca”** – leja e punës e lëshuar në bazë të standardeve dhe normave të miratuara paraprakisht për punëtorët e arsimit për të punuar në institucionet e arsimit parauniversitar.
6. **“Licencimi”** – procesi i lëshimit të lejeve për ushtrimin e punës së mësimdhënësit dhe detyrave tjera në shkollë.
7. **“Mësimdhënës i pakualifikuar”** – personi që ushtron profesionin e mësimdhënësit, i cili nuk ka përfunduar shkollimin e nevojshëm universitar sipas Shtojcës I të këtij UA.
8. **“Programet themelore të trajnimit”** – programe të zhvillimit profesional të akredituara nga institucioni i autorizuar që fokusohen në çështjet lidhur me mësimdhënien dhe mësimnxënien moderne. Këto programe mund të përfshijnë edhe programet e kërkuara nga MASHT për të siguruar zbatimin e reformave të caktuara në mësimdhënie dhe/ose shkollë në përgjithësi zakonisht lidhur me ndryshimin e mësimdhënies dhe mësimnxënies në shkollë duke përfshirë mësimdhënien e lëndëve të caktuara.
9. **“Programet plotësuese të trajnimit”** – programe të zhvillimit profesional të akredituara nga institucioni kompetent që nuk ndërlidhen drejtpërdrejtë me metodologjitë e mësimdhënies por janë në interes të ambientit të shkollës dhe shkollimit në përgjithësi.
10. **“Vlerësimi”** – Gjykimi i cilësisë dhe i vlerës së mësimdhënies, i bazuar në standardet e përcaktuara apo procesi i gjykimit të meritave dhe të arriturave të mësimdhënësit mbi bazën e standardeve, kritereve dhe procedurave në fuqi.
11. **“Mësimdhënës pa arsimim pedagogjik/arsimor (gjatë studimeve)”** – personi që ka diplomë nga fakultetet joarsimore, siç janë fakultetet teknike, fakulteti i mjekësisë, fakulteti i ekonomisë, fakulteti juridik, etj, që nuk ka vijuar aftësim pedagogjik/arsimor.
12. **“Mësimdhënës”**- personi që ushtron procesin e edukimit dhe të arsimimit në institucionet e arsimit parauniversitar (edukatorët e arsimit parashkollor 3-6 vjeç, motrat edukatore që punojnë me fëmijët e moshës 0-3 vjeç, mësimdhënësit e shkollës fillore, mësimdhënësit e shkollës së mesme të ulët, mësimdhënësit e shkollës së mesme të lartë dhe instruktorët që mund të kenë edhe kualifikim jouniversitar, por, që në shkollat profesionale janë përgjegjës për drejtimin e pjesës praktike të punës së nxënësve).
13. **“Mësimdhënës fillestar”** – mësimdhënësit që kanë kualifikimet përkatëse për vendin e punës dhe punësohen për herë të parë. Mësimdhënësi që kthehet në mësimdhënie pas një pauze më të vogël se pesë vite nuk konsiderohet fillestar dhe kalojnë menjëherë në licencën e rregullt të mësimdhënësit të karrierës.
14. **“Performancë”**- Tërësia e punës dhe rezultateve të punës së mësimdhënësve, administratorëve arsimorë dhe të bashkëpunëtorëve profesional.
15. **“Niveli 0 i ISCED”** – Edukimi parashkollor (zakonisht në moshën 0 deri 6);
16. **“Niveli 1 i ISCED”** - Shkollimi fillor (faza e parë e shkollimit themelor) për pesë vite (zakonisht nga moshën 6);

**17. “Niveli 2 i ISCED”** - Shkollimi i mesëm i ulët (faza e dytë e shkollimit themelor) për katër vite (zakonisht nga mosha 12);

**18. “Niveli 3 i ISCED”** – Shkollimi i mesëm i lartë për 3 vite (zakonisht nga mosha 15), duke përfshirë gjimnazin, shkollat profesionale, shkollat e muzikës, artit.

### **Neni 3**

#### **Detyrat dhe përgjegjësitë e MASHT-it në fushën e licencimit**

**1. MASHT-i ka detyrë dhe përgjegjësi:**

- 1.1.** Të përcaktojë kriteret dhe standardet e përgatitjes dhe kualifikimit profesional që një person duhet t’i plotësojë për të marrë licencën për mësimdhënës.
- 1.2.** Të krijojë një sistem licencimi, i cili do të inkurajojë mësimdhënësit e pakualifikuar të kualifikohen dhe mësimdhënësit e kualifikuar dhe të licencuar të rrisin kompetencat dhe kualifikimet, duke i shpërblyer dhe nxitur ata të mësojnë gjatë gjithë jetës në profesionin e edukimit dhe të arsimit.
- 1.3.** Të krijojë një sistem licencimi që do t’ua mundësonte të gjithë mësimdhënësve dhe individëve tjerë në fushën e arsimit të përfshihen në sistemin arsimor duke arritur standardet evropiane.
- 1.4.** Të themelojë Këshillin Shtetëror për licencimin e mësimdhënësve që do të zhvillojë dhe monitorojë politikat dhe praktikat e licencimit si dhe miratojë programet e zhvillimit profesional.
- 1.5.** Të krijojë sistemin e pagesës të bazuar në nivelin e shkollimit, në rezultatet e treguara në punë, në përparimin në karrierë dhe në përvojën e punës.
- 1.6.** Të përkrah materialisht dhe financiarisht asociacionet dhe institucionet që merren me trajnimin e mësimdhënësve.
- 1.7.** Të angazhohet për avancimin dhe përmirësimin e përhershëm të gjendjes sociale dhe financiare të punëtorëve të arsimit në Kosovë, përmes ofrimit të sistemit të stimulimit dhe të fuqizimit pozitiv e sistematik të tyre.
- 1.8.** Të bëjë analiza të hollësishme të funksionalitetit të sistemit të licencimit çdo katër vite si dhe të përgatis ndryshimet e nevojshme për avancimin dhe funksionalizimin e mëtejshëm të sistemit.
- 1.9.** Të zhvillojë databazën e licencimit që do të përcjellë mësimdhënësit individual dhe progresin e tyre në sistemin e licencimit.
- 1.10.** Të sigurojë që institucionet e arsimit të lartë që ofrojnë programe për shkollimin e mësimdhënësve në Kosovë, respektojnë Standardet për Programet që shkollojnë mësimdhënës në Kosovë dhe plotësojnë kërkesat e specifikuar në Shtojcën I të këtij UA ose dispozitat e tjera në fuqi.

### **Neni 4**

#### **Sistemi i licencimit të mësimdhënësve**

**1.** Asnjë mësimdhënës nuk mund të mbajë mësim në shkollat publike dhe private të Kosovës pa licencë që është lëshuar përmes këtij UA.

**Neni 5**  
**Kategoritë e mësimdhënësve që do të licencohen**

1. Përmes këtij UA do të licencohen mësimdhënësit që punojnë në nivelin 0,1,2 dhe 3 të ISCED-it.

**Neni 6**  
**Llojet e licencës sipas kategorive të personave të licencuar**

1. Në këtë UA parashihen licencat në vijim:

1.1. Licenca e përkohshme.

1.2. Licencë e rregullt.

**Neni 7**  
**Licenca e përkohshme**

1. Licenca e përkohshme lëshohet për kategoritë e mësimdhënësve në vijim:

1.1. Mësimdhënësit fillestar;

1.2. Mësimdhënësit të pakualifikuar.

**Neni 8**  
**Kriteret për avancim nga licenca e përkohshme në licencë të rregullt**

1. Mësimdhënësit me licencë të përkohshme sipas nenit 7.1 duhet të plotësojnë 30 orë trajnim nga programet themelore dhe duhet të kenë një vlerësim pozitiv nga shkolla.

2. Mësimdhënësit me licencë të përkohshme sipas nenit 7.2 duhet të plotësojnë kërkesat për t'u bërë mësimdhënës i kualifikuar sipas Shtojcës I të këtij UA dhe të kenë një vlerësim pozitiv nga shkolla.

**Neni 9**  
**Kohëzgjatja e licencës së përkohshme**

1. Licenca e përkohshme do të lëshohet për një periudhë 1- vjeçare.

2. Nëse mësimdhënësit me licencë të përkohshme nuk i plotësojnë kërkesat e nevojshme të specifikuar në këtë UA (neni 8), atyre do t'u jepet edhe një vit shtesë. Nëse përsëri nuk plotësojnë kërkesat atëherë do t'u merret licenca.

**Neni 10**  
**Llojet e licencës së rregullt**

1. Janë katër lloje të licencës së rregullt:

1.1. Licenca e mësimdhënësit të karrierës;

1.2. Licenca e mësimdhënësit të avancuar;

1.3. Licenca e mësimdhënësit mentor;

1.4. Licenca e mësimdhënësit të merituar.

### **Neni 11**

#### **Licencimi i mësimdhënësve aktual që janë në marrëdhënie pune**

1. Mësimdhënësve të kualifikuar, që kanë së paku një vit përvojë pune e që janë në marrëdhënie pune në datën kur ky UA hyn në fuqi u lëshohet licencë e rregullt e mësimdhënësit të karrierës.

### **Neni 12**

#### **Avancimi në karrierë**

1. Të gjithë mësimdhënësit kanë të drejtën e avancimit në sistemin e licencimit sipas dispozitave të këtij UA.

### **Neni 13**

#### **Kriteret për lëshimin e licencës së mësimdhënësit të karrierës**

1. Licenca e mësimdhënësit të karrierës u lëshohet të gjithë mësimdhënësve të cilët i plotësojnë kriteret e specifikuar në nenin 8 të këtij UA.

2. Licenca e mësimdhënësit të karrierës duhet të ripërtërihet pas çdo pesë vitesh me kusht që mësimdhënësi të tregoj rezultate pozitive të performancës (niveli: performancë e kënaqshme në kuptim të shkallës së vlerësimit të performancës të përcaktuar me Udhëzimin administrativ përkatës) dhe të ketë përfunduar 100 orë trajnim gjatë kohës së mbajtjes së licencës së karrierës (prej tyre së paku 70 orë nga programet themelore të trajnimit, ndërsa të tjerat nga programet plotësuese të trajnimit).

3. Në rast se mësimdhënësit në posedim të licencës së rregullt të karrierës nuk plotësojnë kërkesat e specifikuar në nenin 13.2 atyre u jepet një vit shtesë për plotësim të këtyre kërkesave. Në rast se këto kërkesa nuk plotësohen përsëri atyre iu merret licenca.

### **Neni 14**

#### **Kriteret për lëshimin e licencës së mësimdhënësit të avancuar**

1. Licenca e mësimdhënësit të avancuar mund t'i lëshohet mësimdhënësit i cili plotëson këto kërkesa:

1.1. posedon licencë të mësimdhënësit të karrierës së paku në një periudhë prej pesë vitesh;

1.2. ka përfunduar së paku 300 orë trajnim gjatë karrierës, prej tyre së paku 200 orë trajnim nga programet themelore;

1.3. tregon rezultate pozitive të performancës (së paku nivel të mirë të performancës në kuptim të shkallës së vlerësimit të performancës të përcaktuar me Udhëzimin administrativ përkatës).

2. Licenca e mësimdhënësit të avancuar është valide për 5 vite dhe ripërtërihet pas vlerësimit të performancës (mësimdhënësi tregon së paku nivel të mirë të performancës në kuptim të shkallës së vlerësimit të performancës të përcaktuar me Udhëzimin administrativ përkatës).

## **Neni 15**

### **Kriteret për lëshimin e licencës së mësimdhënësit mentor**

1. Licenca e mësimdhënësit mentor mund t'i lëshohet mësimdhënësit që plotëson këto kërkesa:
  - 1.1. posedon licencë të mësimdhënësit të avancuar në një periudhë prej së paku 5 vitesh;
  - 1.2. ka përfunduar së paku 450 orë trajnim gjatë karrierës, nga këto së paku 250 orë nga programet themelore të trajnimit, ndërsa të tjerat nga programet plotësuese të trajnimit;
  - 1.3. tregon rezultate pozitive të performancës (nivel i shkëlqyeshëm i performancës në kuptim të shkallës së vlerësimit të përcaktuar me Udhëzimin administrativ përkatës);
  - 1.4. ofron një rekomandim të shkruar nga drejtori i shkollës.
2. Licenca e mësimdhënësit mentor është valide për 5 vite dhe ripërtërihet pas vlerësimit pozitiv të performancës (tregon nivel të shkëlqyeshëm të performancës në kuptim të shkallës së vlerësimit të performancës të përcaktuar me Udhëzimin administrativ përkatës).

## **Neni 16**

### **Kriteret për lëshimin e licencës së mësimdhënësit të merituar**

1. Licenca e mësimdhënësit të merituar mund t'i lëshohet mësimdhënësit që plotëson këto kërkesa:
  - 1.1. posedon licencë të mësimdhënësit mentor për një periudhë prej së paku 10 vitesh;
  - 1.2. ka përfunduar së paku 650 orë trajnim gjatë karrierës, nga këto së paku 400 orë nga programet themelore të trajnimit, ndërsa të tjerat nga programet plotësuese të trajnimit, dhe
  - 1.3. tregon rezultate pozitive të performancës (nivel të shkëlqyeshëm të performancës).
2. Licenca e mësimdhënësit të merituar është e përhershme.

## **Neni 17**

### **Kalimi në nivel më të ulët dhe revokimi i licencës**

1. Mësimdhënësit kalojnë në nivel më të ulët të licencës nëse nuk i plotësojnë kërkesat për ripërtëritje të licencës aktuale.
2. Mësimdhënësit me licencë të rregullt të karrierës nuk kalojnë në licencë të përkohshme por iu merret licenca.
3. Mësimdhënësve mund t'iu merret licenca që kanë, me kërkesë të Drejtorive Komunale për shkak të procedurave disiplinore. Në rastet kur mësimdhënësit e tillë kthehen përsëri në profesionin e mësimdhënies duhet të kthehen në licencë të përkohshme.

## **Neni 18**

### **Aplikimi për licencim, ripërtrirje dhe avancim të licencës**

1. Secili individ duhet të aplikoj për licencë sipas dispozitave të këtij UA para se të hyjë në profesionin e mësimdhënies.

2. Mësimdhënësit janë përgjegjës që individualisht të aplikojnë për ripërtrirje dhe avancim të licencës.
3. Mësimdhënësit aplikojnë për ripërtrirje dhe avancim të licencës 6-12 muaj para se të skadoj licenca aktuale.
4. Mësimdhënësit aplikojnë për ripërtrirje dhe avancim të licencës në Zyrën e Departamentit të Inspektionit të MASHT-it nën autoritetin e së cilës është komuna ku punon mësimdhënësi.
5. Për secilin aplikacion zbatohet një pagesë prej 25 € apo ndonjë shumë tjetër që mund të specifikohet nga MASHT në të ardhmen.
6. Së bashku me Formularin e Aplikimit mësimdhënësit duhet të sigurojnë dëshmi origjinale për të gjitha informatat e specifikuar në formular.
7. Departamenti i Inspektionit vendos të dhënat e licencimit për mësimdhënësit individual në databazën e licencimit.
8. Vendimi rreth aplikacionit të mësimdhënësit për ripërtrirje të licencës duhet të merret para skadimit të licencës aktuale.
9. Në rastet kur mësimdhënësi aplikon për ripërtrirje ose avancim të licencës brenda afatit kohor të specifikuar në nenin 18, por, vendimi nuk është marrë para skadimit të licencës aktuale, mësimdhënësit i vazhdohet automatikisht licenca aktuale edhe për 6 muaj. Vendimi i tillë duhet të shoqërohet me një arsyetimi të shkruar nga Departamenti i Inspektionit ku sqarohen arsyet e mospërfundimit të procedurës me kohë.
10. Në rastet kur vendimi nuk merret 6 muaj pas skadimit të licencës, drejtori i Departamentit të Inspektionit do të nisë procedurën për konstatimin e përgjegjësisë. Deri në marrjen e vendimit, licenca aktuale e mësimdhënësit mbetet e vlefshme.

### **Neni 19** **Formati i licencimit**

1. MASHT-i i lëshon një numër secilit mësimdhënësi të licencuar dhe një licencë në formë letre që specifikon periudhën e vlefshmërisë, llojin e licencës si dhe të dhënat personale të mësimdhënësit të licencuar.

### **Neni 20** **Ndërlidhja e sistemit të pagave me sistemin e licencimit**

1. Sistemi i licencimit të mësimdhënëseve ndërlidhet me sistemin e pagave. Sistemi i pagave zbatohet sipas vendimit të Qeverisë së Republikës së Kosovës nr. 01/33 të datës 29.08.2008 dhe në të ardhmen do të përshtatet sipas dispozitave relevante në fuqi.
2. Avancimi i mësimdhënëseve në sistemin e licencimit ndërlidhet gjithashtu me ngritje të pagës që do të rregullohet me dispozita të tjera ligjore dhe/ose nënligjore.

### **Neni 21** **Dispozitat kalimtare**

1. Të gjithë mësimdhënësit të cilët sipas nenit 11 të këtij UA kanë marrë licencë të mësimdhënësit të karrierës duhet të aplikojnë për marrjen e licencës së tyre dhe futjen e të dhënave në bazën e të dhënave të licencimit në periudhën janar 2011 – qershor 2011.

2. Në fazën fillestare të licencimit, janar 2011 –gusht 2011, mësime dhënësit ekzistues që kanë marrë licencë të mësime dhënësit të karrierës sipas këtij UA mund të aplikojnë për licencë të

mësime dhënësit të avancuar dhe/ose licencë të mësime dhënësit mentor, pa pasur nevojë të presin afatin e rregullt kohor të specifikuar në këtë UA.

3. Mësime dhënësit që aplikojnë për avancim në sistemin e licencimit sipas nenit 21.2 mund të llogarisin zhvillimin profesional të ndjekur në të kaluarën drejt kërkesave për zhvillim profesional (trajnim) për licencën përkatëse, me kusht që programet e trajnimit të akreditohen nga KSHLM.

4. Mësime dhënësit të cilët nuk i kanë orët e mjaftueshme të zhvillimit profesional nga e kaluara mund të aplikojnë për avancim në sistemin e licencimit sipas nenit 21.2 nëse kanë 15 vite përvojë pune në momentin e aplikimit për licencën e mësime dhënësit të avancuar dhe 20 vite përvojë pune në momentin e aplikimit për licencën e mësime dhënësit mentor.

5. Mësime dhënësit të cilët aplikojnë për avancim në karrierë sipas dispozitave kalimtare të këtij UA, në rastet kur marrin vlerësim negativ të njëjtëve ju ndalohe riaplikimi për 5 vitet e ardhshme.

#### **Neni 22**

#### **E drejta e ankesës**

1. Ankesat ndaj procesit të licencimit mund të bëhen në Komisionin për Ankesa dhe Parashtrës në MASHT.

#### **Neni 23**


#### **Dispozitat shfuqizuese**

1. Me hyrjen në fuqi të këtij UA shfuqizohen UA 16/2008, UA 33/2007, si dhe dispozitat e tjera që kanë rregulluar këtë fushë e që janë në kundërshtim me këtë UA.

#### **Neni 24**

#### **Hyrja në fuqi**

1. Ky Udhëzim administrativ hyn në fuqi ditën e nënshkrimit nga ministri i Arsimit, Shkencës dhe Teknologjisë.

  
**Elver Hoxhaj, ministër**



## **Shtojca I**

### **Kualifikimet e mësimit në sistemin e licencimit**

Në sistemin e licencimit të mësimit do të merret për bazë gjendja aktuale e shkollimit të mësimit në Kosovë, në veçanti në lidhje me kërkesat e hyrjes së mësimit në profesion.

Kualifikimet në vijim do të pranohen në sistemin e licencimit dhe mësimit përkatës do të konsiderohen të kualifikuar për pozitën përkatëse:

#### **Klasifikimi i kualifikimeve ekzistuese**

##### **Niveli 0 i ISCED-it**

1. Shkolla e mesme e mjekësisë: motra edukatore – niveli parashkollor, mosha 0-3
2. Programi parashkollor i ish-Shkollave të Larta Pedagogjike, Fakultetit të Mësuesisë, dhe Fakultetit të Edukimit – mosha 3-6.

##### **Niveli 1 i ISCED-it**

1. Programi i ish- Shkollës Normale
2. Programi fillor i ish- Shkollave të Larta Pedagogjike
3. Programi fillor i ish- Fakultetit të Mësuesisë;
4. Programi fillor i Fakultetit të Edukimit
5. Programi i Pedagogjisë (e përgjithshme) në Fakultetin Filozofik do të pranohet vetëm për mësimit që tashmë janë në sistem, ndërsa mësimit që vijnë të rinj me një kualifikim të tillë nuk do të konsiderohen të kualifikuar për mësimit.

##### **Niveli 2 i ISCED-it**

1. Programet lëndore të ish- Shkollave të Larta Pedagogjike
2. Programet lëndore të Fakultetit të Edukimit
3. Diplomat e lëshuara nga departamentet akademike (Matematikë dhe Shkenca, Filologji, Filozofi, Artet, Edukatë Fizike).

##### **Niveli 3 i ISCED-it**

1. Diplomat e profilit arsimor të lëshuara nga departamentet akademike (Matematikë dhe Shkenca, Filologji, Filozofi, Artet, Edukatë Fizike)
2. Diplomat e lëshuara nga Fakultetet joarsimore (Fakultetet Teknike, Juridiku, Mjekësia, Ekonomia)
3. Për pozitën e instruktorit në shkollat profesionale, kualifikimet e nivelit ISCED 3 janë gjithashtu të pranueshme.

Shënim 1: Mësimdhënësit me kualifikimet më lartë janë të kualifikuar vetëm nëse punojnë si mësimdhënës të lëndës/ve për të cilën është lëshuar diploma dhe nivelin që është përcaktuar në Shtojcë të këtij UA.

Shënim 2: Diplomat e lëshuara nën ndonjë sistem ose strukturë tjetër, duke përfshirë edhe diplomat e lëshuara jashtë vendit, do të kategorizohen sipas klasifikimit më lartë, pasi ato të jenë njohur paraprakisht përmes mekanizmave në fuqi.

Shënim 3: Diplomat të cilat nuk mund të kategorizohen përmes kësaj shtojce do të shqyrtohen në bazë individuale nga KSHLM.

Shënim 4: Miratimi i programeve që shpijnë drejt kualifikimit të mësimdhënësit, dhe përcaktimi i standardeve për programet që përgatisin mësimdhënës, rregullohen përmes ligjeve dhe akteve tjera nënligjore.